

Gabinete Mike Eman: Ekipo tras di Facilidatnan Multifuncional ta consisti di hobennan profesional Arubiano



ORANJESTAD (AAN): Durante e presentacion cu Gobierno di Aruba a duna ayera na prensa riba e ultimo desaroyonan di e proyecto di Facilidat-

nan Multifuncional, a resalta un punto y esey ta e participacion di hobennan profesional Arubiano den su ehecucion.

For di su desaroyo y plania-

cion te na e diseño y maneho di e centronan aki, tin su tras e conocemento y experiencia, pero tambe e boluntad y amor pa nos isla di varios yiu di tera cla pa traha duro y cu honestidad. Esaki ta un hecho cu ta yena Prome Minister Mike Eman cu hopi satisfaccion. Ademá di enfatisa e participacion cu cada un di e comunidadnan en cuestion tabatin den e creacion di nan propio Facilidat Multifuncional, tambe por conta na cabes cu hobennan manera Omar Harms dirigiendo e proyecto y ex-director di YMCA Aruba, Anki Vrolijk.

For di prome instante Harms y consecuentemente Vrolijk a dirigi tur e esfuersonan cu ta wordo haci den e proceso aki. Tin biaha e ta mas di loke hende por mira na simpel bista. Ta trata di sesionnan di informacion y dialogo cu e hendenan di bario, palabracion cu arkitekto, e directiva y personal di Hulpbestuurskantoornan existente, tramite y documentacion di tur loke ta referi na e aspecto legal manera financiamiento, destaho publico y contratistanan te na e entrenamiento di e personal den nan

funcion nobo. Solamente e parti di diseño y planificacion, a percursa pa un parti extenso di e trabou.

Pa loke ta trata esey, Gabinete Mike Eman a conscientemente a scoge pa deposita nan confianza den tres hoben arkitekto Arubiano. Tur tin bon conocemento y experiencia amplio cu varios proyecto priva y publico riba nos isla. E facilidat Multifuncional di Savaneta ta diseña pa arkitekto y ingeniero structural Ivar Thijsen kende a gradua na 2004 como Bachelor of Science in Built Environment for di e Haagse Hoteschool na Den Haag.

Den pasado el a asumi responsabilidad importante na Valero y actualmente e ta dirigi su compania propio yama Thijsen Engineering & Consultancy N.V. E Facilidat Multifuncional di Paradera ta un creacion ir. Jouel Croes di e oficina Croes Architecture Studio N.V. of CAST N.V. Despues di su estudio na Aruba, el a gradua na TU Delft y tin experiencia amplio tanto den restauracion di edificionan historico, como den diseño di structuranan moderno. Ir. Croes tin na su encargo tambe e restauracion di e monumento

na punta di Zoutmanstraat.

Otro arkitekto Arubiano cu a presenta su diseño na e encuentro cu prensa ta ir. Orlando Hoevertsz. Como director di e oficina Hoevertsz ArchiDesign N.V. e arkitekto tin na su encargo e diseño y plan di e Facilidat Multifuncional na Noord. Ir. Hoevertsz tambe ta un graduado di e Technische Universiteit Delft. E tin un lista largo di proyectonan renombra tanto na Aruba como na isla ruman di Corsou. Entre otro por menciona Stadion Frans Figaroa na Noord y e expansion di Bestuurskantoor den forma di e edificio 'Colishi' cu actualmente ta den construcccion.

Mas aleu, a scoge y ta preparando un personal di gerente y assistentnan di gerente pa cada un di e cinco Facilidatnan Multifuncional. Nan lo tin e tarea di dirigi y maneha e personal corespondiente, den un scala di servicionan hopi mas amplio di loke ta conoci na e Hulpbestuurskantoornan actual. Minister Presidente Eman a expresa su confianza den e ekipo aki ora cu durante e conferencia di prensa el a indica cu "Nos ta sigur cu nos tin e personanan cu lo bay haci un gran trabou."